

**PRAVILNIK O USLOVIMA U POSTUPKU IZBORA
NASTAVNIKA I SARADNIKA NA VISOKOJ ŠKOLI ZA
FINANSIJE I RAČUNOVODSTVO FINra**

Na osnovu člana 79. Zakona o visokom obrazovanju („Službene novine Tuzlanskog kantona“ broj 7/16, 10/16, 5/17 i 15/17), člana 103. a u vezi sa članom 35. Statuta Visoke škole za finansije i računovodstvo FINra Tuzla, na 27. sjednici održanoj 20.12.2019. godine Senat Visoke škole za finansije i računovodstvo FINra Tuzla, donosi:

PRAVILNIK O USLOVIMA U POSTUPKU IZBORA NASTAVNIKA I SARADNIKA NA VISOKOJ ŠKOLI ZA FINANSIJE I RAČUNOVODSTVO FINra

I OPŠTE ODREDBE

Član 1.

(Predmet Pravilnika)

Ovim Pravilnikom utvrđuju se postupak i uslovi za izbor nastavnika i saradnika u odgovarajuće nastavno zvanje na Visokoj školi za finansije i računovodstvo FINra (u daljem tekstu - Visoka škola FINra).

Cilj je da se ovim Pravilnikom:

- definišu uslovi za izbor;
- da se osigura da postupak iz stava 1. ovog člana bude jasan i jednoobrazan za sve;
- da se jasno i precizno utvrdi proces i koraci kod sticanja izbora, te
- utvrdi nadzor i kontrola čitavog postupka i kontinuiranog poboljšanja.

II POSEBNE ODREDBE

Član 2.

(Nastavna zvanja)

Na Visokoj školi FINra vrši se izbor u nastavna zvanja:

1. Profesor visoke škole,
2. Predavač visoke škole, i
3. Asistent visoke škole.

Član 3.

(Uslovi za izbor u nastavna zvanja)

Minimalni uslovi za izbor u nastavna zvanja na Visokoj školi FINra su:

1. Profesor visoke škole:
 - naučni stepen doktora nauka u datom području, odnosno završen stepen trećeg ciklusa,
 - pokazana nastavna sposobnost,
 - objavljeni radovi.
2. Predavač visoke škole:
 - završen stepen drugog ciklusa obrazovanja,
 - pokazana nastavna sposobnost .
3. Asistent:
 - završen stepen prvog ciklusa sa najmanje 240 ECTS bodova, s najmanjom prosječnom ocjenom 3,5 ili 8.

Na Visokoj školi FINra nastavu mogu izvoditi i lica koja imaju zvanja redovnog profesora, vanrednog profesora i docenta birana na univerzitetima.

Član 4.

(Period izbora u nastavna zvanja)

Profesori, predavači i asistenti biraju se na vrijeme utvrđeno zakonom, i to:

- asistent na period od četiri godine bez mogućnosti reizbora;
- predavač Visoke škole na period od pet godina s mogućnošću ponovnog izbora;
- profesor Visoke škole trajno.

Član 5.

(Reizbor)

U postupku reizbora uzimaju se u obzir i ranije ispunjeni uvjeti za isto nastavno zvanje.

U slučaju ponovnog izbora u zvanje, kandidat treba da ispunjava najmanje uslove koji predstavljaju minimum za taj izbor.

Član 6.

(Postupak izbora u nastavna zvanja)

Izbor akademskog osoblja u svim slučajevima vrši se javnim konkursom, u skladu sa uslovima i kriterijima određenim Zakonom, Statutom i opće prihvaćenim standardima u datoj struci.

Za pripremanje prijedloga za izbor u nastavna zvanja, Senat Visoke škole FINra imenuje komisiju od 3 (tri) ili 5 (pet) članova u istom ili višem zvanju od zvanja u koje se kandidat bira.

Većina članova komisije mora biti iz iste, a ostali članovi mogu biti iz srodne naučne oblasti za koju se kandidat bira.

Izbor u više zvanje i reizbor akademskog osoblja provodi se objavljivanjem internog konkursa na način utvrđen Statutom Visoke škole FINra.

Član 7.

(Konkurs za izbor u nastavna zvanja)

Konkurs za izbor u nastavna zvanja raspisuje se za naučnu oblast, odnosno predmete naučne oblasti.

Odluku o raspisivanju konkursa donosi Senat Visoke škole FINra.

Konkurs iz stava 1. ovog člana može se raspisati za jedno ili sva zvanja o čemu odlučuje Senat Visoke škole FINra.

Javni konkurs za izbor se objavljuje u najmanje jednom dnevnom listu, i na službenoj web stranici Visoke škole FINra.

Član 8.

(Istaknuti stručnjak iz prakse)

Visoka škola FINra, bez raspisivanja javnog konkursa i bez zasnivanja radnog odnosa, može angažovati istaknutog stručnjaka iz prakse za izvođenje određenih sadržaja nastavnog plana i nastavnog programa.

Pod istaknutim stručnjakom iz prakse u smislu prethodnog stava, podrazumijeva se lice koje posjeduje radno iskustvo i rezultate iz oblasti na koju se angažuje na Visokoj školi FINra.

Član 9.

(Raspisivanje konkursa prije početka školske godine)

Polazeći od potrebe da se nastavni proces organizuje na kvalitetan, racionalan i efikasan način, Senat Visoke škole može prije početka školske godine raspisati javni konkurs za izbor u nastavna zvanja,

s tim da cjelokupni proces oko utvrđivanja odgovornih nastavnika mora biti završen do početka semestra odnosno najkasnije 30 dana prije početka akademske godine.

Član 10.

(Komisija za izbor u nastavna zvanja)

Radi pripremanja prijedloga za izbor, Senat Visoke škole FINra imenuje Komisiju za izbor u nastavna zvanja iz reda nastavnika.

U slučaju da na Visokoj školi FINra nema akademskog osoblja odgovarajućeg zvanja, moguće je angažovati akademsko osoblje s druge visokoškolske ustanove.

Komisija za pripremanje prijedloga za izbor priprema izvještaj o prijavljenim kandidatima, i predlaže za izbor jednog ili više kandidata u skladu sa uslovima iz konkursa.

Prilikom predlaganja kandidata, Komisija je dužna poštovati minimalne uslove za izbor u odgovarajuće zvanje, u skladu sa Zakonom, Statutom i ovim Pravilnikom.

Član 11.

(Izveštaji Komisije)

Na osnovu svog rada članovi Komisije dužni su sačiniti Izvještaj o prijavljenim kandidatima i ispunjenosti uslova svakog od kandidata, koji se dostavlja Senatu na odlučivanje.

Rok za dostavljanje izvještaja Senatu Visoke škole je 30 dana od dana dostavljanja materijala sa konkursa i dostavlja se u pisanoj formi. Senat Visoke škole razmatra izvještaj Komisije, utvrđuje prijedlog o izboru u odgovarajuće zvanje i donosi odluku o izboru u zvanje. Senat Visoke škole odluku o izboru kandidata u predloženo zvanje donosi većinom glasova ukupnog broja članova.

Član 12.

(Pokazana nastavna sposobnost)

Pod pokazanom nastavnom sposobnošću podrazumijeva se ispunjenje jednog od sljedećih uslova:

- da je kandidat učestvovao u izvođenju nastave na prvom ciklusu studiju najmanje jednu školsku godinu;
- da je kandidat prezentirao temu iz stručne oblasti na pristupnom predavanju pred Komisijom koju odredi Senat Visoke škole FINra, te da je njegovo pristupno predavanje ocijenjeno kao uspješno.

Član 13.

(Komisija za ocjenu pristupnog predavanja)

Komisiju za ocjenu pristupnog predavanja imenuje Senat Visoke škole FINra.

Odluku koja sadrži datum i vrijeme održavanja pristupnog predavanja potpisuje predsjedavajući Senata, i ista se objavljuje na oglasnoj ploči Visoke škole FINra najkasnije 7 (sedam) dana prije održavanja pristupnog predavanja.

Pristupno predavanje traje jedan nastavni čas, i prisutni mogu postavljati pitanja vezana za održanu temu kandidatu za izbor u nastavno zvanje.

Nakon održanog pristupnog predavanja, Komisija sačinjava izvještaj o održanom pristupnom predavanju kandidata i dostavlja ga Senatu Visoke škole FINra.

Član 14.

(Rad Senata u provođenju procedure izbora)

Na osnovu dostavljenog izvještaja Komisije za izbor u nastavna zvanja, Senat Visoke škole FINra donosi Odluku o izboru u roku od 30 (trideset) dana od dana prijema prijedloga.

Senat nije vezan prijedlogom Komisije, i može iz razloga neusklađenosti s odredbama Zakona, Statuta i ovog Pravilnika donijeti odluku o vraćanju prijedloga odluke Komisije radi njegovog preispitivanja i usklađivanja sa pomenutim propisima.

Ako se započeti postupak izbora u akademsko zvanje ne okonča u roku od 6 (šest) mjeseci od dana raspisivanja konkursa, Senat će konkurs poništiti.

Senat donosi odluku o izboru kandidata u predloženo zvanje većinom glasova ukupnog broja članova Senata.

**Član 15.
(Arhiviranje)**

Odluka o izboru u zvanje dostavlja se Sekretaru škole radi arhiviranja i dostavljanja Odluke o izboru kandidatu.

III ZAVRŠNE ODREDBE

**Član 16.
(Tumačenje Pravilnika)**


Nadzor nad provedbom ovog Pravilnika vrši Direktor, a tumačenje Pravilnika vrši Senat Visoke škole FINra.

**Član 17.
(Stupanje na snagu i primjena Pravilnika)**

Pravilnik stupa na snagu danom donošenja, od kada se i primjenjuje.
Pravilnik će se objaviti na web stranici Visoke škole FINra.

Broj: 01-328-8/19

Datum: 20.12.2019. godine

Predsjedavajući Senata

Dr. sc. Ismet Kalić, docent

